

**БАЙНГЫН ХОРООНЫ ДАРГЫГ СОНГОХ ТУХАЙ АСУУДЛЫГ
ХЭЛЭЛЦСЭН ТАЛААРХ ХҮНИЙ ХӨГЖИЛ, НИЙГМИЙН БОДЛОГЫН
БАЙНГЫН ХОРООНЫ САНАЛ, ДҮГНЭЛТ**

2026 оны 04 дүгээр
сарын 21-ний өдөр

Улаанбаатар
хот

Илтгэгч нь: Улсын Их Хурлын гишүүн П.Наранбаяр

Улсын Их Хурлын дарга, эрхэм гишүүд ээ,

Монгол Улсын Их Хурлын тухай хуулийн 8 дугаар зүйлийн 8.1.6 дахь заалт, 25 дугаар зүйлийн 25.6 дахь хэсэг, Монгол Улсын Их Хурлын чуулганы хуралдааны дэгийн тухай хуулийн 23 дугаар зүйлийн 23.1 дэх хэсэгт заасныг тус тус үндэслэн Байнгын хорооны даргыг сонгох тухай асуудлыг Хүний хөгжил, нийгмийн бодлогын байнгын хороо 2026 оны 04 дүгээр сарын 21-ний өдрийн хуралдаанаараа хэлэлцээд дараах санал, дүгнэлтийг Та бүхэнд танилцуулж байна.

Хүний хөгжил, нийгмийн бодлогын байнгын хорооны хуралдаанд Улсын Их Хурлын гишүүн П.Наранбаяр Монгол Улсын Их Хурлын тухай хуулийн 25 дугаар зүйлийг баримтлан Байнгын хорооны даргад Улсын Их Хурлын гишүүн Пүрэвжавын Ганзоригийг нэр дэвшүүлж, хэлэлцүүлээ.

Пүрэвжавын Ганзориг нь 1984 онд төрсөн, эхнэр хүүхдүүдийн хамт амьдардаг. 1991-2001 онд Хөвсгөл аймгийн 10 жилийн дунд сургууль, 2001-2005 онд Монгол Улсын их сургуулийн математик, компьютерийн сургуулийг тус тус төгссөн, математикч мэргэжилтэй. 2005-2008 онд “Номин даатгал” хязгаарлагдмал хариуцлагатай компанид эрсдэлийн шинжээч, актуарч, 2008-2011 онд тус компанийн гүйцэтгэх захирал, 2010-2013 онд “Монголын даатгалын холбоо”-ны ерөнхийлөгч, 2018 оноос “Үндэсний стратегийн хүрээлэн”-ийн удирдах зөвлөлийн гишүүн, 2016-2020 онд “Их эрин холдинг” хязгаарлагдмал хариуцлагатай компанид төлөөлөн удирдах зөвлөлийн дарга, 2020-2024 онд нийслэлийн иргэдийн Төлөөлөгчдийн Хурлын төлөөлөгч, мөн онд Хан-Уул дүүргийн иргэдийн Төлөөлөгчдийн Хурлын төлөөлөгч, Бүлгийн дарга, 2015 оноос ХҮН намын Удирдах зөвлөлийн гишүүн, 2016-2020 онд ХҮН намын Хариуцлагын Ерөнхий хорооны дарга, 2021-2026 онд ХҮН намын Ерөнхий нарийн бичгийн дарга, 2024 оноос Монгол Улсын Их Хурлын гишүүн, 2025 оноос Улсын Их Хурал дахь ХҮН намын Зөвлөлийн даргаар ажиллаж байна.

Байнгын хорооны хуралдааны үеэр Улсын Их Хурлын гишүүн С.Эрдэнэбат нэр дэвшигчийг дэмжиж байгаагаа илэрхийлээд боловсрол, эрүүл мэнд, нийгмийн хамгааллын салбарын улсын төсөв, цалингийн асуудлаар хамгийн түрүүнд юу хийх талаар болон ХҮН намын гишүүний хувьд ямар бодлого баримталж ажиллах чиглэл тус намаас өгсөн талаар асуулт асууж, хариулт авав.

Улсын Их Хурлын гишүүн С.Зулпхар зохих түвшний улс төрийн ажлын болоод орон нутагт ажиллаж байсан туршлагатай, бодлогын тодорхой санал, шийдэл гаргадаг гишүүн тул Байнгын хорооны даргаар ажиллахыг дэмжиж байгаагаа илэрхийлээд, Байнгын хорооноос боловсролыг дэмжих жилийн хүрээнд Засгийн газарт чиглэл өгсөн тогтоолыг баталсан бөгөөд хэрэгжилтийн явцын талаарх мэдээллийг 2027 оны улсын төсвийн санал боловсруулахаас өмнө буюу 5 дугаар сард багтаан сонсох, түүнчлэн Боловсрол, шинжлэх ухааны дэд хорооны гишүүд чуулганы завсарлагааны хугацаанд шинжлэх ухааны байгууллагуудаар очиж ажиллан санал зөвлөмж гаргасныг Байнгын хороогоор хэлэлцэн шийдвэрлэхэд анхаарах талаар үг хэлэв.

Улсын Их Хурлын гишүүн Б.Найдалаа Байнгын хорооны эрхлэх асуудал болох боловсрол, эрүүл мэнд, хөдөлмөр эрхлэлт, нийгмийн хамгаалал, соёлын салбар бол хүний төлөө ажилладаг салбар тул хүний хөгжил гэж нэрлэсэн нь маш оновчтой, зөв зарчим байсан, энэхүү салбар хоорондын уялдааг хангаж ажиллахад Байнгын хорооны үүрэг чухал бөгөөд зөвхөн салбарын төлөө биш, хүний хөгжлийг тодорхойлдог эдгээр салбарыг цогцоор нь харж ажиллах талаар, Байнгын хорооны даргаар ажиллаж байх хугацаандаа эрүүл мэндийн даатгалын шинэчлэлийн асуудалд анхаарал хандуулж ажиллахын зэрэгцээ хууль, тогтоолоор үүрэг, чиглэл болгосон Улсын Их Хурлын шийдвэрийн биелэлтийн асуудалд санаачлага гарган, ажлын хэсэг байгуулж, үр дүнтэй ажилласан, Байнгын хороо бол парламентын мэргэшсэн гол бүтэц, хүчтэй цэг бөгөөд Байнгын хорооны үйл ажиллагаа сайн байвал төрийн бодлого сайн байх учраас гишүүд өөрсдийн итгэл үнэмшил, мэргэшсэн чиглэлээрээ санаачлагатай ажиллаж, зохих газарт нь нэгдэн аль болох сэдэв давхцалгүй олон асуудлыг шийдвэрлэхийн төлөө ажиллах талаар үг хэлсэн болно.

Хүний хөгжил, нийгмийн бодлогын байнгын хорооны даргад Улсын Их Хурлын гишүүн Пүрэвжавын Ганзоригийг нэр дэвшүүлснийг хуралдаанд оролцсон гишүүдийн олонх буюу 94.1 хувийн саналаар дэмжсэн.

Улсын Их Хурлын эрхэм гишүүд ээ,

Байнгын хорооны даргыг сонгох тухай асуудлыг хэлэлцсэн талаарх Хүний хөгжил, нийгмийн бодлогын байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал хандуулсанд баярлалаа.

ХҮНИЙ ХӨГЖИЛ, НИЙГМИЙН
БОДЛОГЫН БАЙНГЫН ХОРООНЫ
ХУРАЛДААН ДАРГАЛАГЧ



Л.ЭНХНАСАН